

## 13. gr.

Segja má maður sig úr félaginu, ef  $\frac{2}{3}$  félagsmanna samþykkja á lögmætum félagsfundi eða ef svo reynist, að landareign hans verður mun meiri kostnaður að félagsskapnum en öðrum landareignum, samanborið við hagnaðinn eða hagræðið. Úr ágreiningi um hið síðarnefnda atriði skal skorið með mati, sem skjóta má til fullnaðarúrskurðar félagsmálaráðherra.

Ef maður segir sig úr félaginu, skal hann ábyrgjast öll þau gjöld, sem á hann hafa fallið samkvæmt ákvæðum samþykktar þessarar til þess tíma, er hann fer úr félaginu.

## 14. gr.

Félaginu skal slíta, ef ályktun um það er samþykkt á tveim lögmætum félagsfundum í röð, enda sé ályktuninni fylgjandi eigi færri en  $\frac{2}{3}$  allra félagsmanna.

Um skipti og meðferð á eignum félagsins fer eftir ákvæðum XI. kafla vatnalaga nr. 15 20 júní 1923 og fyrirmælum skiptalaganna, eftir því, sem við á. Verði eignir umfram skuldir, skal þeim skipt milli félagsmanna að rétttri tiltölu við þá fjárhæð, sem hver þeirra hefur samtals greitt til félagsins.

## 15. gr.

Verði félaginu slitið, skal Árskógshreppur eiga rétt á að kaupa eignir félagsins fyrir matsverð, ef ekki nást samningar um verðið. Til matsins skal hvor aðili nefna 2 menn, en sýslumaður Eyjafjarðarsýslu oddamann.

## 16. gr.

Samþykktum þessum verður ekki breytt nema á aðalfundi, enda hafi breytingartillagnanna verið getið í fundarboði og að minnsta kosti  $\frac{2}{3}$  atkvæðisbærra fundarmanna séu samþykkir þeim.

Samþykkt þessi staðfestist hér með samkvæmt vatnalögum nr. 15 20. júní 1923, til þess að öðlast þegar gildi og birtist til eftirbreytni öllum þeim, sem hlut eiga að máli.

*Félagsmálaráðuneytið, 28. nóvember 1956.*

**Hannibal Valdimarsson.**

*Hallgrímur Dalberg.*

## REGLUGERÐ

fyrir vatnsveitu Hauganess og nágrennis.

## 1. gr.

Vatnsveitufélag Hauganess og nágrennis hefur einkaleyfi til sölu vatns á svæði því, sem vatnsveitan nær yfir, og hún getur fullnægt, svo og til hafnar á Hauganesi.

## 2. gr.

Öll framkvæmdastörf, er vatnsveituna varða annast stjórn félagsins. Skal hún skipuð 3 mönnum og jafnmörgum til vara.

## 3. gr.

Vatnsveitan lætur leggja aðalvatnsæðar um hreppinn svo víða, sem fært þykir, svo að húseigendur eigi greiðan aðgang að þeim í fyrirhuguðu vegarstæði eða götu,

**158** þar sem það er hægt eða sem næst lóðarmörkum. Frá aðalæðum skulu húseigendur 28. nóv. sjálfir leggja vatnsæðar í hús sín á sinn kostnað.

4. gr.

Hver sá, sem komast vill í samband við vatnsveituna, skal senda skriflega umsókn þar um. Umsókninni skulu fylgja upplýsingar um, hve mikið vatn viðkomandi telur sig þurfa að nota.

5. gr.

Skylt er húseiganda að halda vatnsæðum sínum vel við og láta tafarlaust gera við þær, ef leki kemur að þeim eða aðrar bilanir. Hann skal sérstaklega gæta þess, að ekki frjósi í þeim. Sama skylda hvílir á lóðareiganda. Enginn má setja aflvélar í samband við vatnsveituna, nema með samþykki félagsstjórnar og með þeim útbúnaði, sem hún telur tryggan.

6. gr.

Félagsstjórn getur fyrirskipað takmörkun á vatnsnotkun, ef skortur er á vatni; þá getur hún lokað fyrir vatnið, ef þess þarf, vegna hreinsunar á vatnsgeymum eða viðgerðar á vatnsæðum. Slík lokun skal tilkynnt fyrirfram, ef nokkur tók eru á. Fullan vatnsskatt ber að greiða, þótt slík lokun fari fram.

7. gr.

Félagsstjórn er heimilt að loka fyrir vatn hjá þeim, sem eftir ítrekaða áminningu eyða vatni að óþörfu, eða vanrækja að gera við bilanir á leiðslum sínum, svo og ef þeir hafa vatnsæðum sínum þannig fyrir komið, að óþrif hljótist af, eða greiða ekki vatnsskatt á réttum gjalddaga.

8. gr.

Skylt er manni að láta af hendi land sitt og landsafnot í þarfir vatnsveitunnar, svo og mannvirki, og þola þær eignakvaðir, óhagræði og takmörkun á afnotarétti, sem vatnsveitan kann að hafa í för með sér, enda komi fullar bætur fyrir samkvæmt mati, ef ekki næst samkomulag.

9. gr.

Hver sá, sem tekur vatn úr vatnsveitunni án heimildar, eða á annan hátt en ráð er fyrir gert, í þeim tilgangi að losna við að greiða gjald fyrir, skal sæta sektum, nema þyngri refsing liggji við samkvæmt hegningarlögunum, auk þess er honum skylt að greiða fyrir vatnið samkvæmt mati félagsstjórnar.

10. gr.

Hver sá, sem skemmir eða saurgar vatnsæðar vatnsveitunnar, brunna hennar eða önnur mannvirki, skal greiða fullar bætur fyrir samkvæmt mati tveggja dómkvaddra manna, og sæta sektum, nema þyngri refsing liggji við.

11. gr.

Félagsstjórn eða trúnaðarmönnum hennar er heimilt að fara í hús manna, þar sem vatnsæðar liggja, til athugunar og aðgerðar. Ef útbúnaði er að einhverju leyti ábótavant, skal húseigandi tafarlaust bæta úr því, ella er stjórninni heimilt að gera við það á hans kostnað.

12. gr.

Af öllum íbúðarhúsum í Árskógshreppi, sem virt eru til fasteignamats, og vatni er veitt í, eða úr næst til vatnsæða í götu, vegi eða opnu svæði, er lóð þeirra telst til, skal greiða vatnsskatt. Skatturinn skal lagður á eftir lögskipaðri fasteigna-

matsvirðingu húsanna. Skatt skal einnig greiða eftir virðingarverði fastra véla, sem **158** í húsinu eru, ef þær eru vátryggðar ásamt því og nota vatn úr vatnsæðum vatnsveitunnar. 28. nóv.

## 13. gr.

Af öllum húsum í Árskógshreppi, sem svo er ástatt um, sem um getur í 12. gr. reglugerðar þessarar, skal greiða vatnsskatt að upphæð 2% — tvo af hundraði — þó skal lágmark skattsins vera kr. 100.00 — eitt hundrað krónur — fyrir hvert íbúðarhús.

## 14. gr.

Af húsum, sem nota vatn til annars en venjulegra heimilisparfa vegna atvinnu, sem í þeim eru rekin, er útheimtir mikið vatn, svo sem frystihús, þvottahús, verk-smiðjur, baðhús, iðnaðarfyrirtæki o. fl., skal greiða vatnsskatt 2% — tvo af hundraði — af fasteignamati, nema öðruvísi sé sérstaklega um samið við vatnsveitunefnd.

## 15. gr.

Fyrir önnur vatnsnot skal greiða sem hér segir:

|   |           |
|---|-----------|
| Fyrir hvern stórgrip, sem stendur inni .....            | kr. 10.00 |
| Fyrir hverja sauðkind .....                             | — 1.00    |
| Fyrir hvern kjötskrokk .....                            | — 0.10    |
| Fyrir vatn í steypu af hverri sementstunnu .....        | — 1.00    |
| Fyrir vatn til skipa, hverja smálest .....              | — 10.00   |
| Fyrir innveginn fisk í fiskiðjuver, hverja smálest .... | — 2.00    |
| Fyrir saltfiskþvott, hverja smálest .....               | — 1.00    |

## 16. gr.

Húseigandi ber ábyrgð á greiðslu vatnsskatts húsa. Atvinnurekandi ber ábyrgð gagnvart vatnsveitunni á greiðslu vatnsskatts.

Eigandi framleiðslustöðvar eða atvinnustofnunar ber ábyrgð á, að vatnsskattur af vatnsskattskyldri framleiðslu eða verkun í stöð hans sá greiddur á gjalddaga.

## 17. gr.

Reikningsár er almanaksárið. Gjalddagi vatnsskatts húsa er 1. júlí ár hvert, og greiðist vatnsskatturinn í einu lagi fyrir liðandi ár. Vatnsskattur samkvæmt 14. gr. fellur í gjalddaga um leið og varan er framleidd. Vatnsskattur samkvæmt 15. gr. fellur í gjalddaga mánaðarlega eftir á, eða þegar rekstur hættir ár hvert. Vatnsskatt má innheimta með lögtaki á kostnað notanda, og er hann tryggður með lögveði í eigninni næstu tvö ár eftir gjalddaga með forgangsveði fyrir hvers konar samningsveði eða aðfararveði.

## 18. gr.

Heimilt er félagsstjórn fyrir eitt ár í senn að hækka eða lækka vatnsskattinn um allt að 50%.

## 19. gr.

Brot gegn reglugerð þessara varða sektum allt að kr. 500.00, nema þyngri refsing liggji við að lögum. Mál út af brotum gegn reglugerð þessari skulu sæta meðferð almennra lögreglumála.

Reglugerð þessi, sem Vatnsveitufélag Hauganess og nágrennis hefur samið og samþykkt og gerð er samkvæmt lögum nr. 15 20. júní 1923, staðfestist hér með til að öðlast þegar gildi, og birtist til eftirbreytni öllum þeim, sem hlut eiga að máli.

*Félagsmálaráðuneytið, 28. nóvember 1956.*

**Hannibal Valdimarsson.**

**Hallgrímur Dalberg.**